



Bentiaraq Ottosen
Atassut

UKA 2024/59 aamma 87
17. oktober 2024

Savaateqarfinnut inoqarfinnullu allanut nannut tikiuttut qimaatinniarsareqqaarnagit takunneqqaartumit pisarineqarsinnaalersillugit nalunaarutaanni nr. 5-imi, allanngortinneqarnissaannik aalajangiiffigisassaattut 6. marts Naalakkersuisut siunnersuut. Namminersorlutik 2023-meersumi Oqartussat aalajangersakkat peqquneqarnissaannik Inatsisartut Nannup pisarineqartup neqaa najukkami agguanneqassaaq sinneralu pisaqartumut tunniunneqarsinnaassalluni.

(Inatsisartunut ilaasortaq, Mariane Paviasen, Inuit Ataqtigiit)

Nunatta kujataani nannuttassiissutigineqartartut ukiumut sisamaasut 2025-imiit ikinnerpaamik ataavartumillu qulinngortinneqarnissaat qulakkeeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Anders Olsen, Siumut)

Siullertut Atassummiit maluginiakkatta ilagaat immikkoortut marluk pineqarnerat, kipiluttunartutullu isigalugu. Siunnersuutit marluk immikkut siunnersuusiaanerat ataqqineqartariaqaraluartoq isumaqarluta, tassami siunnersuutit marluk immikkuullareqqissaartumik siunnersuusiasut ilisimagatsigit.

Atassummiit illersortuassavarput piujuaannartitsilluni inuussutissarsiortortatta pitsaasumik atugassaqartinnissaat, soorlu nunalerinermik savaateqarnermik inuussutissarsiutillit eqqaaneqarsinnaasut. Ukiuni kingullerni nannut kujataani aatsaat taamak amerlatigisut tikiuttalerput, silap pissusiata allanngoriartorneranut inoqarfinnut qanillattornerat maluginiarneqartoq oqarsinnaalluta. Nunaateqarfinni savaateqarfinnilu immikkuullarissuuvoq tamanna nannut tikiukkaangata sukkanerpaamik pisarineqarnissaanut inatsiliortoqarnissaa, tamaasiortoqarpallu Atassummiit isumaqarpugut nunaateqarnermi savateqarnermilu inuussutissarsiutillit piujuaannartitsisumik inuussutissarsiortuunerat naqissuserusullugu immikkut ittumik aaqqissuusisoqartariaqartoq. Ukiormi kaajallallugu inuussutissarsiutigaat tamanna, naatsorsuutigineqassaarli tamatuminnga SPS (savaatillit peqatigiit suleqatigiissut) suleqatigilluinnartariaqarnera.

Nannut inoqarfinnut inuussutissarsiorfiusunut takkukkaangata inuussutissarsiutit ingerlanneqartut, soorlu nunaateqarneq savaateqarnerlu navianartorsiortinneqalertarput. Tamanna Atassummiit erseqqissarusupparput, toqqissisimaneq naqissuserneqassappat taamaattoqartariaqartoq. Nunatta kujataani savaatillit 38-it ingerlatsisuupput, taakkunanilu toqqissisimasumik inuuneqartitsissagutta akisussaaffeqartariaqarpugut inatsimmik allannguissalluta. Illersorsinnaasariaqarpagut nunatsinni

inoqataammata aamma, taamaattumik Atassummiit allannguutissatut siunnersuummik imaattumik saqqummiussaarpugut: **Nannunik piniarneq illersuinerlu pillugit Namminersorlutik Oqartussat nalunaarutaani Nr. 5 6. Marts 2023-meersoq allanngortinneqarnissaa pillugu Naalakkersuisut nalunaarusioqqullugit peqquneqarnissaannut Inatsisartut aaliangiiffigisassaattut siunnersuut.**

§§ 20. *Nannut siusinnerusukku qimaatinniarneqartaraluarlutik inoqarfinnut uteqqiattut inunnut, peqqumaatissatut katersukkanut aamma pigisanut immikkut aningaasaqarnermut tunngatillugu pingaarutilinnut qularutissaanngitsumik ajoqusiisinnaasut toqunneqarsinnaapput, takuuk imm. 5. Nanoq ajornartorsiutaasoq inuussutissarsiutigalugu piniartumit atuuttumik akuersissutilimmit toqunneqarsimappat, inuussutissarsiutigalugu piniartoq pineqartup nanoq pissavaa. Nanoq ajornartorsiutaasoq nakkutilliisumit, politiinit imaluunniit kommunefoged-imit toqunneqarsimappat, neqaa sumiiffimmi agguanneqassaaq, nannullu pisataasa sinneri tamarmik Kalaallit Nunaanni Namminersorlutik Oqartussanut tunniunneqassallutik.*

Imm. 2. Nannunik inoqarfinnit qimaatitsiniarnerni tamani Aalisarnermut Piniarnermullu Naalakkersuisoqarfik ingerlaannartumik attavigineqassaaq.

Imm. 3. Nanoq ajornartorsiutaasut inuussutissarsiutigalugu piniartumit toqunneqarpat kommunip pisassiisutaanniit nanoqatigiit pineqartut iluanni ukiumi pineqartumi imaluunniit aqutsiveqarfimmi nannuttassiisutit tamakkerneqarsimappata ukiumi pisassiiviusumi tulliuttumi ilanngaatigineqassaaq.

Imm. 4. Nannut arnavissat ataatsimik imaluunniit arlalinnik piarallit imm. 1-mi pineqanngillat.

Imm. 5. Piniarnermut nakkutilliisut, politiit, kommunefoged-it, inuussutissarsiutigalugu piniartut pisinnaatinneqartut imaluunniit allat Aalisarnermut Piniarnermullu Naalakkersuisoqarfimmit pisinnaatinneqartut taamaallaat imm. 1 naapertorlugu nannumik toqutsisinnaatitaapput.

“Atassummiit pingaartissimavarput, Savaatillit inuussutissarsiorfiata iluani nannunik navianartorsiortinneqarpata ajoqqusersorneqarpatalu toqunneqartarnissaat pillugu peqqussut ilanngunneqassaaq”.

Ukiuni kingullerni kujataani nannut inoqarfinnut qanillatsernerat malunnartorujussuuvoq, inuussutissarsiutigalugulu piniartut nannuttassat tamakkereernerini pisassallu nungoreernerini nannut takkusimaarujussuarnerat pillugu pisassat amerlineqarnissaanik noqqaassuteqartut ilisimavagut. Atassummiit oqariartuutigerusupparput, Naalakkersuisut pisassanik ilasisariaqartut. Kujataani ukiuni kingullerni ajornartorsiutaaleraluttuinnarpoq nannut amerlasuut tikiuttarnerat annertuserujussuarsimanerat.

Silap pissusiata allanngoriartornera pillugu inoqarfinnut qanillattortut amerliartuinnavipput, taamakkuva isumaqarpunga isiginiarneqartariaqalersut. Nannut kujataani pisassiisutigineqartartut sisamaanaapput, Atassummiillu oqariartuutigerusupparput pinngitsoornani Naalakkersuisut tusarnarissaat. Ajornartorsiut alligaluttuinnarpoq allanngortinneqartariaqarpoq.

Nannut qaasuttuupput, inuussutissarsiutigineqartariaqarpulli, neqissaqarnikkut aamma inuussutissarsiutigalugu piniartunut sumiiffinni pineqartuni aningaasarsiornikkut pitsaasumik kinguneqartussaavoq. Nannut qulit pisassiisutigineqartariaqartut Atassummiit innersuullugu taparserparput, pisariaqartissimavarput ukiuni kingullerni annertuumik kujataani innuttaasut aamma malugimmassuk nannut amerlerujussuarnerat.

Taamatut oqaaseqarluta allannguutissatut saqqummiussaqaarpugut, immikkoortoq 59 allannguutissatut siunnersuut aalisarnermut piniarnermut nunalerinermullu ataatsimiititaliamut ingerlateqqillugu. Immikkoortoq 87 taperserlutigu aalisarnermut piniarnermut nunalerinermullu ataatsimiititaliamut ingerlateqqipparput.